

四庫全書

子部

欽定四庫全書

子部

續書畫題跋記卷七

詳校官中書_臣朱文翰

編修_臣程嘉謨覆勘

總校官知縣_臣繆琪

校對官編修_臣汪鏞

謄錄監生_臣李昂

欽定四庫全書

續書畫題跋記卷七

明 郁逢慶 編

趙文敏公諸賢天冠山詩

天冠山題詠

龍口巖

峭石立四壁寒泉飛兩龍人間苦炎熱仙山已秋風

洗藥池

真人棲隱處洗藥有清池金丹要沐浴玉水自生肥

鍊丹井

丹成神仙去井冽寒泉食甘美無比倫華池咽玉液

長廊巖

脩巖如長廊下有流泉注山中古仙人步月
自來去

金沙嶺

攀蘿緣石磴步上金沙嶺露下色熒熒月生
光炯炯

昇僊臺

僊臺高幾許時時覆雲氣一去三十年令人
每翹企

逍遙巖

茲巖足逍遙下可坐百人豈徒木石居直與
猿鶴隣

靈湫

靈湫不受汗深淺何足計小憩松竹鳴蕭蕭
山雨至

寒月泉

我嘗游惠山泉味勝牛乳夢想寒月泉携茶
就泉煮

玉簾泉

飛泉如玉簾直下數千尺新月橫簾鈎遙遙
挂空碧

長生池

竹實鳳將至水清魚自行著我草亭裏危坐
學長生

道人巖

道士本避世間之無姓字如何千載後石室有人至

雷公巖

雷公起卧龍為國作霖雨飛電掣金蛇其誰敢予侮

石人峯

巨靈長亘天何時化為石特立千萬年終古無人識

學堂巖

仙人非癡人山中猶讀書嗟我廢學久聞此一長吁

老人峯

有石象老人宛然如繪素稽首禮南極蒼蒼在烟霧

月巖

月巖如偃月風泉灑晴雪仙境在人間真成兩奇絕

鳳山

山鷄愛羽毛飲啄琪樹間照影寒潭靜翔集落花間

仙足巖

窈窕石室間中有仙人躅說與牧羊兒慎勿傷吾足

鬼谷巖

鬼谷巖前石唐文字字奇何當拂蒼蘚細讀
老君碑

風洞

石壁何空洞中有風泠然安知列御寇不向
此中仙

釣臺

仙者非有求坐石視投釣咄哉羊裘翁同名
不同調

磔潭

神龍或潛淵石洞通水府勿遺兒曹劇飛空
作雷雨

馨香巖

山險通鳥道水深有蛟龍誰言仙樂鳴高人
方耳聲

三山石

我有泉石癖甚愛山中居何當從羣公講學
讀吾書

五面石

洞中即仙境洞口是桃源何殊武陵路雞犬
自成村

小隱巖

林藪未為隱仙厓猶可梯終當携家去瑤草
正萋萋

一線天

醜雞舞甕天井蛙居坎底莫作一線看開眼
九萬里

道士祝丹陽示余天冠山圖求賦詩將刻石山中為

作此二十八首延祐二年十月二十四日松雪道人

小隱巖

山鬼小兒足木精游女神據會學真隱下視
飛花塵

馨香巖

深睡失明珠猛走飛流涎松花卷輕雨滴滴
百重泉

學堂巖

露盤下金薤雲笈流珠纓泠泠寒巖下猶有
嬰兒聲

鬼谷巖

縱橫太古石短長千歲籐感彼岩盡子獨飲
古澗冰

昇仙臺

寥寥入太清金門繚紫垣或云有官府微誦
五千言

釣臺

垂綸落澄潭小魚儵然來大魚引之去釣石何崔嵬

一線天

茲山可容天舉世皆笑之我不答此語鼓腹支其顚

五面石

分一只成五五石各有一誰能據其上面面不相失

寒月泉

曉汲寒泉清明月各在在空空不見月引水復在手

金沙嶺

金沙雖為貴履之傷我足愧彼側布人欲獲無量福

長生池

飲水人已去山中多白頭青蘋空淺處時見玉蟾浮

老人峯

高帽側整整秀嶺深重重積此太古雪遂名老人峯

三山石

三山不可度絕壁峙書堂流水日浩浩太極彌茫茫

磔潭

沈沈無底谷央央太古雲赤日焦下土老蛟眠不聞

王簾泉

截玉作明簾不知簾外事應有碧眼仙隔簾見人主

石人峯

飡玉未得法變形成楚囚九轉乞換骨三沐期點頭

仙足巖

山深猿狖驚瞬息下神步空飛本無蹤長嘯上天去

月巖

顧兔樂嬉遨入地不得騁化為白玉泉彷徨返東井

雷公巖

神鈞起空洞陰火生羽翰我耳杳不聞白雲在天冠

道人巖

道人本無姓對客那有言龍口並石髓鳥跡開雲根

丹井

金鼎悶寒泉真人彌不壞年深定飛騰子夜吐光怪

洗藥池

靈根乘月吠肉芝生土肥濯以上源水千歲永不饑

鳳山

孤飛千仞岡兩翼化為石年年春風時山花成五色

風洞

岡風轉空輪浩劫不停息此為天地根視之杳無迹

逍遙巖

形留非自在何者為逍遙青松在谷口白雲在山腰

長廊巖

飛吟起霞珮馭氣躡天梯碧雲布參差纖脩與巖齊

龍口巖

弄月紅玻璃匿雲紫芙蓉近已厭狡獪納息玄虛中

靈湫

靈龜道其前游鯨殿其後歲久深自韜清夜岩下走

清容居士書

趙素楠氏

龍口巖

噴薄細成霧噫嘻忽為風孰知生死關在此
呼吸中

洗藥池

隱芝生肥水飛根漱靈泉流香到人世飲者
壽萬年

丹井

古丹深藏井晨光發崖谷有能下取之錫以
兩環玉

玉簾泉

神仙不愛寶萬古玉為簾願遣天風約當明
弄海蟾

長廊巖

細霧不濕衣落月見長影緩引步虛吟盡此
秋衣冷

金沙嶺

昔踏金沙灘今陟金沙嶺向來瑣骨觀即是
太陽鼎

飛昇臺

絕景斷塵情寥寥入太清可須臺百尺更待
羽翰生

逍遙巖

昔誦逍遙遊長憶藐姑射百世待神人瘦影
落寒石

靈湫

澄空如不測為谷廓能容沙石俱成寶龜魚
摠是龍

寒月泉

無盡山下泉普供山中侶各持一瓢來摠得
全月去

長生池

竹根飛赤鯉荷葉戲靈龜不道神仙宅長生
別有池

道人巖

斷崖窮鳥道絕頂出秋旻能此高居者誰非
有道人

老人峯

冠顛風披披垂嶺雲皓皓諸峯羅兒孫獨得
老人號

雷公巖

神物時時出人間皆震驚誰知岩上看才是
小兒聲

月巖

岩園徑尺雪天墮第二月豈無凌虛人飛行
廣寒闕

仙足巖

失脚踏人間一往不復收遂令學步者只循
行迹求

鬼谷巖

閒閣雲無定從衡石作關任渠名鬼谷亦未
離人間

風洞

渾渾復浩浩刀刀仍泠泠空洞幾許如蓄此
無邊聲

石人峯

何年餐石髓屹立照清波如此成終古長生
亦為何

學堂巖

翩翩學仙子羣居此山顛定無書可讀姑以
聲相傳

鳳山

聖神千古上風雨九疑空只有山中竹旋為
十二宮

馨香巖

潭水下深黥日星隱文章鼓雲出石氣洒雨
作龍香

釣臺

危石上崙欹清風百尺垂故人恐多事莫道
釣翁誰

磔潭

未始滿盈過何曾波浪興衆皆資善利此獨
保無能

三山石

三山可飛度舟楫不能通莫執茲峯石攀緣浪費功

五面石

一石作五分何者是真面拄杖試敲看莫作點頭見

小隱巖

深淺辟世塵長恐與名親故是絕知者誰言無隱人

一線天

太空誰自碍峽徑事幽行天體元無外通君一線明

余賦此詩時以小字書之袁伯長學士禮部王繼學尚書趙承旨先後同賦雜書同一卷後云失去復得趙公如前而求書其後偶閱故紙得縈草餘紙謬錄之

虞伯生甫

龍口巖

飛泉龍口懸平石，
蒼波淺。龍背展高會，
瀛洲人一笑。

洗藥池

長生底，湏學神芝何處采。
湛然在。不見洗藥人，清波

丹井

丹井只三尺，四時無虧盈。
願乞靈。餘波飲可仙，我亦

玉簾泉

天孫織玉簾，懸之千仞石。
空山碧。玉垂垂不復收，滴滴

長廊巖

誰謂山中險，長廊亦晏然。
山人眠。花開春雨足，月落

金沙嶺

峻嶺接仙臺，仙人獨往來。
拂雲開。簫聲吹日落，鶴翅

昇仙臺

高臺去天咫，有仙從此昇。
白層層。遺迹若可攀，山雲

逍遙巖

老竹空巖裏，懸厓飛水前。
逍遙篇。欲識逍遙境，試讀

靈湫

神龍蟠
聽秋雨

泥沙宅此巖之阻遊人勿輕觸歷歷

寒月泉

泉清孤月現夜久空山寒不用取煮茗自然
滌塵煩

長生池

脩竹夾清池一亭山之西長生人已去誰能
汨其泥

道人巖

道人出白雲空巖為誰碧獨往誰得知時有
鶴一隻

雷公巖

谷口陰風來山頭暮雲舉但見飛電光山人
賀春雨

老人峯

何年南極星隨地化為石至今明月夜清輝
倚天碧

月巖

飛泉何許來明月此夜滿登高立秋風妙趣
無人歎

仙足巖

一足不能行神仙寧此留祇以形之似高縱
何處求

鬼谷巖

道散亦已久世變如浮雲石壁有太古為問
空同君

風洞

清風貯深洞四時常氤氲飄然無遽發散我
山中雲

石人峯

仙人立危峯欲作凌雲舉飄然閱浮世獨立
寂無語

學堂巖

仙人讀書處樵子時聞聲猶勝爛柯者只看
棋一枰

鳳山

孤鳳栖山中白雲護清境朝陽早飛來月落
空巖冷

馨香巖

蛟涎漬頑石磴道何崎嶇深潭湛古色興雲
只須臾

釣臺

地非七里灘名乃千古同神仙聊戲劇何有
一絲風

磑潭

山川萬古秘雲雨一潭幽何日卧龍起碧潭
空自秋

三山石

三山豈仙居百世真道學荒臺明月秋懷哉
彼先覺

五面石

奇石不為峯何用作五面獨立賞春暉水流
花片片

小隱巖

拙矢射白額歸洞讀舊書小隱不可見後來
誰卜居

一線天

青天何蕩蕩此中纔一線大通本來明慎勿
安所見

東平王繼學士熙朱文

龍口巖

晴瀑歟飛沫曉雲虛空青我欲探頷珠第恐
龍睡醒

洗藥池

仙苗濯靈根幽池發神光至今池中水猶作
芝木香

丹井

丹成人已仙有井在巖竇如何萬穉川方里
覓勾漏

長廊巖

脩巖深石室香烟曳晴虹步虛聲欲斷行道猶未窮

金沙嶺

佛將金布地仙以金為嶺笑殺塵世人愛金如愛命

昇仙臺

真仙妙神化平地可飛昇喝石為此臺將以遺雲仍

逍遙巖

萬物皆自適誰獨鵲與鵬何事巖下叟愛讀南華經

靈湫

巖阿泓水淺無龍何為靈老君道猶龍占此一勺清

寒月泉

湛如規王瑩冷若清水冽汲來試酌之乃是一片月

玉簾泉

山月明銀鈎烟蘿垂帶綠何人啟巖扃挂此一簾玉

長生池

鑿池不為口游鱗樂其天豈無赤鯁公飛駕琴高仙

道人巖

道人昔脩道煉形巖穴中道成人已去白雲鎖青松

雷公巖

帝遣雷公來為民作年豐天橋巖下羊孰云非雨工

石人峯

壁立千仞岡不與世俯仰憑誰喚元章來此拜石丈

學堂巖

天人無愚惜讀書乃真仙學堂在巖谷此道今誰傳

老人峯

老仙欲飛騰龍鍾恨無翼笙鶴等不來化作峯頭石

月巖

誰將脩月斧斷此石一彎為報折柱人蟾宮在人間

鳳山

秋風吹竹實朝陽照梧樹定有吹簫人來此山中住

仙足巖

猷聞神仙名不見神仙形何年伸一足踏在幽巖局

鬼谷巖

鬼谷久為鬼蒼厓名不磨吐哉千載下儀秦
一何多

風洞

白羽無用搖披襟坐空明不聞萬籟響但覺
兩腋清

釣臺

桐江一綠風萬古蜚英聲築臺學嚴子道人
不求名

礫潭

澄淵窈深碧波光射琳宮時有聽經叟恐是
潭中龍

馨香巖

巖洞深水府具闕栖幽靈腥霧襲人鼻時作
龍涎馨

三山石

蓬瀛孰云遠神仙在人間中有列仙像白日
生羽翰

五面石

一石具五面吐納五方氣遙看石上雲時現
五色瑞

小隱巖

陵藪未為僻巖穴入深窈山村掩市廛茲隱
孰云小

一線天

巖上天萬里巖下天一線慎勿謂天小有眼
首不見

金華王奎景文甫

龍口巖

虛氣雲脩脩噴薄雨傾注手臂蒼壁開嶄然
頭角露

洗藥池

長鑱劖靈根濯以上池水餘波濕黃精不洗
俗子耳

鍊丹井

金丹淪井底千載水渾赤短綆顧波深三巖
生羽翼

長廊巖

虛牕開脩廊回風走落葉夜月照無眠披衣
來步月

金沙嶺

築塢莫愕藏披沙亦良苦小嶺隅仙家黃金
賤如土

飛仙臺

棄世如脫屣竦身即蓬萊臺空白雲滿笙鶴
時歸來

雷公巖

微陽地中復一鼓元氣行驚起懶龍蟄毋作
嬰兒聲

石人峯

振衣陟高岡質化日已遠天荒地維拆獨立
心不轉

學堂巖

邃然若厦屋中隱列仙裾常聞伊吾語不讀
人間書

老人峯

細草胸垂鬚積雪髮飄素相逢或歎辛甲子
不知數

月巖

四萬八千戶斲此寶月圓置風大地動明年
飛上天

鳳山

何年覽輝下借此松桂栖春風一振羽百鳥
不敢啼

逍遙巖

林木以為廬井石以為席朗誦逍遙游小大
各自適

靈湫

坎井蔽荆棘居然閔神靈願借一勺水為霖
慰蒼生

寒月泉

清如三危露冷若太古雪舉瓢斟酌之一洗
五情熱

玉簾泉

仙家金銀闕低垂白玉簾天風忽卷起玕瑤
鳴織織

長生池

靈龜或千歲游魚亦有神會比菊潭水盡壽
南陽人

道人巖

道人仙去久道人名尚存樵青相雄長竭來
欲爭墩

仙足巖

仙人本空飛可望不可即誰能及踵武徒爾
泥形跡

鬼谷巖

清溪絕氛垢靈風滿巖屏空餘山木壽三歎
游仙詩

風洞

山間空洞腹百竅時一噫獨坐碧窓寒洗耳
聽天籟

釣臺

危石可箕踞投竿俯深清寄語羊裘子釣魚
非釣名

磑潭

潭色深黝黑無底通歸虛安得然犀照下燭
鮫人居

馨香巖

巖谷下空嵌潭底正深黑心清香自聞龍坎
在盤石

三山石

三山擁巖宮濟濟衿佩列但使本心明神仙
不留訣

五面石

削成元氣中屹立高崒崒五面雖不同貞堅
心若一

小隱巖

朝市亦可隱上累官府多濯足澗下水晞髮
山之阿

一線天

坐井祇見小一線難求通蒼蒼覆九有無人
為發蒙

括蒼林傳以道

子昂諸賢賦天冠山五言詩二十八首模寫已盡矣

予遂作唐律一章以題卷尾云

閑閑道人吳金節

青山特地聳天冠聞說王仙駕紫鸞浮世黃金空白髮
倚雲蒼玉尚玄壇松根怪石千年化檜頂飛泉六月寒
弘景定辭神武去鷗波浩蕩錦江干

天歷二年六月十又一日雨中書

龍口巖

日落霞光吸春深雨沫飛昂藏無壑相吐納
有仙機

洗藥池

好在池中水誰留海上方至今人拘處千載
有餘香

丹井

千年井水赤人道有遺丹姹女顏何在飛仙骨已寒

玉簾泉

泉飛到地垂借問卷何時昨夜崐岡火仙闕渾不知

長廊巖

洞府廊千步苔封不盡春升堂并入室今古豈無人

金沙嶺

此嶺入仙家金星射日華極知同糞土何用化丹砂

飛昇臺

石湧數層臺高人去不迴肉身無羽翼誰復是仙才

逍遙巖

欲識逍遙處茲游隘九州一巖能幾許空有此名留

靈湫

山靈守此宅雲霧起時時人道蓬萊淺龍歸人不知

寒月泉

寒月在泉底酌泉和月吞秋光冰人齒宵次幾乾坤

長生池

吞嚙華池水仙傳不死方此池名美耳人壽若為長

道人巖

道人何許人巖冷耿餘情人已無形影如何問姓名

雷公巖

巖裏有雷公巖前劈怪松寥寥天宇大萬蟄幾秋冬

老人峯

神散形不化癡頑一老翁仙人鍊石髓何日為還童

月巖

老兔得仙藥依巖晝夜明可憐天上者不似我長生

仙足巖

石上巨人迹傳聞古亦然巖今露一足那不是飛仙

鬼谷巖

巖是仙人宅猶存鬼谷名黃冠如許衆誰解說縱橫

風洞

日日洞門開清風洞裏來天生仙境界不許有塵埃

石人峯

塊石立巖扃頑然不復靈空令千載下猶說是仙形

學堂巖

道侶本非像巖居恐腹虛仙經人不識當是讀何書

鳳山

何年來覽德疑此類岐周繇羽今誰見山名自爾留

馨香巖

此是斬蛟地腥氣冷幾年空巖香氣滿定有水中仙

釣臺

臨水臺千尺人家不姓嚴今無釣鰲手贏得老龍潛

磔潭

磔高開洞府宅此有龍君不盡池中水湏容世上分

三山石

三片山根石侵雲品字排時時會孔老東觀復西齋

五面石

統體一太極居然五氣分無由知艮背面面自生雲

小隱巖

仙人不可見來往太虛空
瑣瑣巖居者何山與爾同

一線天

崖高天破碎一線不堪紐
莫道女媧死彌縫自有人

元統乙亥余自洪校文還
吾宗丹陽師出示天冠山
二十八詠皆朝貴手筆余
何敢下注脚然以宗誼重
師請不能辭它日見者必
曰何物小子敢污此卷則
知罪矣祝堯

龍口巖

何年鑿山骨雙闕鬱崢嶸
行人不敢近中有風雨聲

洗藥池

仙家種瑤草養之日月華
藥池流水出世上得胡麻

丹井

羽人千歲去丹井春泉肥何如未央宮銀林生夕霏

玉簾泉

泉影懸玉簾瀑布界青壁神君騎黃鶴隱士歌白石

長廊巖

長廊不可居四時嵐氣寒別有如堂者好作玄都壇

金沙嶺

今沙生嶺頭仙子鳬鷁穩空谷無足音高人樂真隱

飛昇臺

步上昇仙臺飄然隔萬塵天底星辰近雲氣常逼人

逍遙巖

朝看碧桃花夕譜洞簫曲大年駐清景逍遙本無欲

靈湫

山中有靈湫古來是龍宅墮月沈流光出雲透深碧

寒月泉

洞天在眼中石竇消古雪自有松桂林因之煮寒月

長生池

日月馳兩轂催逼世人老養息長生池千歲童顏好

道人巖

石巖有仙居終古與石存十年穀城山寂寂誰與論

雷公巖

雷公不上天收聲息巖戶龜田嘉禾死為起作霖雨

老人巖

嫋嫋烟霧質宛宛星宿精千歲毛髮青誰呼老人名

月巖

嫦娥老不嫁獨在冰雪宮何年入山中素影滿江東

仙足巖

仙足本無縱凌雲逐黃鵠忽見山中人來言有靈躅

鬼谷巖

日照神清洞雲封鬼谷巖古仙無姓字櫟葉翦春衫

風洞

洞口風泠泠日吹松桂寒泉聲夜相和環珮玉珊珊

石人峯

高峯似石人天丁斧刀削不見宣和年千秋倚雲帳

學堂巖

仙骨出靈昭邈與文字謝如何學堂巖叢螢照中夜

鳳山

文鳥出丹穴飛下青琅玕永謝秦王女長依舜樂官

馨香巖

種花弱水西斬龍赤岸東夜風吹天香何似博山銅

釣臺

六鰲戴神山仙宅白玉樓釣客坐空臺此物不可求

磑潭

寒潭積重泉下有神物樓高秋吹木葉不敢下連漪

三山石

三山在何處迢遞大江東不得丹經訣欲訪浮丘公

小隱巖

牛下有歌詩丘中有鳴琴歎彼考槃人千載誰知心

五面石

三山水清淺五面石檀藥苔磴緣蘿合花房
映竹盤

一線天

日車馳九萬天影積一線品彙涵太虛何如
管中見

柏臺馬伯庸父

龍口巖

呼吸通元氣飛潛順化機風雷生倏忽造物
豈兒嬉

洗藥池

采藥白雲裡洗藥清池中池水尚香潔仙人
已乘空

丹井

鑿石通泉脉鑄鼎鍊丹砂丹成騎鶴去滿地
生雲霞

玉簾泉

燦爛金為屋玲瓏玉作簾飛泉來百道定有
老龍潛

長廊巖

磬聲遠搖曳銓影明參差洞章歌已徹行道
尚委蛇

金沙嶺

緩步長廊巖更上金沙嶺慎勿貴金沙忘却昇仙境

飛昇臺

黃鵠去不返白雲還自飛神仙豈無有何事
踏危機

逍遙巖

鵬搏九萬里籬鴉飛咫尺所以達觀人亦各
適其適

靈湫

白雲縹緲起驟雨頃刻來神龍一奮迅為農
甦旱災

寒月泉

啣冰漱齒頰嚙雪滌胃腸此泉若寒月飲之
年命長

長生池

滄波幾清淺此水淨無淤應有得仙人洗髓
伐毛去

道人巖

巖花自開落山鳥時來去道人息深深凡聖
難窺覷

雷公巖

陰陽一四薄蕭翹皆奮飛安知聲原氣蓄此
甚細微

老人峯

雪披素髮短雲覆錦衣長遠近瞻南極高峯有景光

月巖

空巖何圓圓老樹亦纚纚天光雲影中明月忽在指

仙足巖

神仙已遐舉誰復繼其跼安知蓬萊山在此不移足

鬼谷巖

昔有鬼谷子術知亦多奇遂令後世士靡靡競趨時

風洞

天地本空洞運化無停機冷然萬竅作起自一嘘歔

石人峯

臨風衣自整對月影偏長獨立經寒暑真成石作腸

學堂巖

萬象自森列千載瞬息間仙家學無為心境乃清閒

鳳山

鳳有五色瑞千載一來翔往者不可見相期白雲鄉

馨香巖

月中古桂根巖阿種來久秋風昨夜生馥馥
透窓牖

釣臺

高臺垂釣人應是經綸手尚父與嚴陵解後
豈無有

磔潭

澄潭湛無底頻觀毛髮寒但見龜魚出焉知
龍下蟠

三山石

每上三神山可望不可到即此是三山可與
論至道

五面石

何年星墮天化作五面石面面不相看相看
還是一

小隱巖

山深人寂寂澗曲水沄沄顧爾非忘世遺身
在白雲

一線天

蒼蒼倘非天天竟何形似莫於通塞中見此
一線止

京兆杜清碧本

雍國公虞丞相古劍歌

古劍歌

至正庚寅十月余遊錢唐過四壁山中與青城山樵遇
樵出示余古劍乃其先公相國所遺也余為樵古劍歌
以歌之

古劍古劍原非鐵亦非干將與莫邪自從混沌鑄成來
出鞘入鞘何生滅輝天燦地不須磨肅氣稜稜凜霜雪
是以曾將破敵首采石江頭建勲業海晏塵清歌太平

瑤匣藏之在巖穴或時拈出與人看千古萬古歎猛烈

野泉翁

虞相古劍歌

有引

宋相虞忠肅公八世孫堪謁余雲間草玄閣自云先丞相有古遺器四曰瓦琴石磬蜀王硯與此劍也劍長古赤三握具五寸弱握有二稜起款識可辨者曰千萬歲其鐔橫寸二狀饕餮未甚銳縵文為水銀古中末間黝漆色芒可吹毛星月下出之艷發孚尹凜凜然可寒鬼

膽是誠千載物也於是酌堪以酒酒酣為作虞相古劍歌使與古虞公劍同傳為其家寶云

昔聞虞公古劍可以追騰空迴落日千年宗社已丘墟
子姓西來傳不失江淮都督憤國讎八陵痛骨三十秋
采石江頭一提出寒芒夜激妖氛收堪子堪子傳八葉
價金不售山西俠床頭寶匣不敢開黃蛇上天走雄雷
持謁雲間鐵龍父灑以延津拭以赤塵土虹光一道裂
蛟胎上指黃星落黃雨嗚呼舞鴻門刺魚肚二豎汝何

足數我將假霜鏐代天矛西山斫白額二東海斬蛟三
頭然後裂蚩尤殪獠猴大開太陽照九州堪子堪子勿
失汝劍兮使我徒請尚方斬馬之具於朱游

至正二十五年青龍集乙巳王正上日抱遺叟楊維禎
在雲間草玄閣書

雍公孫子氣甚清示我楊顛古劍行劍鋒詩律兩奇絕
秋蓮光彩玉庚庚楊顛健筆老縱橫亦是鐵中之錚錚
吐辭鬱律鳴不平吁嗟鳳皇來為盛世鳴一代惟數虞

翁生余也學書學劍既老何由而成名

古劍行

倪瓚已酉冬

雍國丞相虞公古劍一具今藏其孫勝伯家毗陵倪
元鎮匡廬陳惟寅既作歌詩詠之且要余同賦焉

雍公古劍射日星鐵冶鑄出秋霜刃寒光耿耿試一掃
魑魅罔象都逃形匣藏繡澀不敢連龜鱗虎文驚且竦
閱歷星霜三百年社稷山河自茲重雍公磊砢雲夢胸
白虹紫電符采同有時呼酒醉踏月浩歌起舞多英風

采石江頭却胡騎一戰突營誰可比材官勇將號如雲
每視竒功獨懷媿劍鋒猶漬佞血鮮神物不隨陵谷遷
只愁雷電破屋壁化作蒼龍飛上天

淮海秦約

文仲

鄧文肅公臨急就章

大德三年三月十日為理仲雍書於大都慶壽寺僧房
巴西鄧文原

天歷庚午清明日汾亭石巖民瞻觀於武林宗陽明

復齋

隸古

至正八年六月二十日會稽楊維禎偕河南陸仁同
展卷於東滄聽海閣仁嘗學章草者以此卷入臨品
之能云

至正庚寅夏五月二十又四日方外張雨謂素履齋
書此蚤年大合作中歲以往爵位日高而書學益廢
與之交筆硯始以余言為不妄殆暮年章草如隔世
矣信為學不可止如此

洪武十一年戊午歲五月豐城余詮拜觀於東倉之
甘泉里寓舍

急就篇漢黃門令史游作益推本蒼頡爰歷博學凡
將等篇而廣之也今石刻相傳為吳皇象書比顏師
古所注者無焦滅胡以下六十三字又頗有訛脫始
東漢人以用篆法寫此章故又號章艸此卷前元鄧
文肅公所臨公繇房山高公薦入掌制誥出持憲節
斯乃應秦翰林時為理仲雍所書觀其運筆若神螭

出海飛翔自如仲雍名熙于闐人好古博雅為吳郡判官建言助役法民便之弘農楊子綸出示求題故并及之

洪武十二年三月清明日後學袁華書於鰲峰精舍嘗論急就篇此小學家之說漢史游倣凡將為之也未叙長安涇渭街術後或增以齊國山陽二章宋歐陽修居史館日以餘力及於是篇取州名裒次之然為篇去古逾遠脫漏訛舛不無人欲辨其失得而增

補亦徒自勞耳漢人以篆法書之故曰章草此草書之祖也近世人多尚草真行未始學而先習草如人未能立而欲走蓋可笑也况章草之來本於科斗籀篆觀其運筆圓轉用意深妙烏有不通籀篆而能學者哉苟有聰明之人雖不通籀篆能彷彿其形似猶可其奈刻鵠不成者耶自東漢以降臻乎妙者惟皇象鍾繇王右軍而已唐宋間人臨鍾王所書亦不多見欲習之者不通籀篆誠難乎哉此卷巴西鄧文肅

公所臨公在元時不獨以文章名世而又以能書名
世號稱三大家公與馬觀公運筆用意甚合古人之
妙此卷寶希世之寶也亮上人出示乞余題余故以
草書之難習併錄於卷末非但以警於人而有以自
警也

洪武二十七年倉龍甲戌秋七月獨菴道衍寫於海
雲東軒

正統戊午中秋後二日武昌陳謙拜觀於毗陵寓舍

小遊仙詩

鸞書趣燕五城東下視星辰在半空行過瑤臺重回首
玉清更在有無中

虎豹眈眈守帝閭銀灣水氣曉氤氲石榴花下霓裳隊
競染香雲製舞裙

城闕芙蓉曉未分身騎金虎謁元君青童不道天家近
笑指空中五色雲

三十六宮丸內春邯鄲却憶夢中身帶將一箇城南樹

去謁仙班十八人

飄飄仙樂下珠庭又從麻姑降蔡經麟脯鳳脂皆可壽

長生何必斲松苓

溪頭流水飮胡麻曾折瑤林第一花欲識道人藏密處

一壺天地小於瓜

不到麟洲五百年歸來風日尚依然稱龍化作雪衣女

來問東華古玉篇

春宴瑤池日景高烏紗巾上插仙桃長桑樹爛金雞死

一笑黃塵變海濤

高駕飈車過大瀛神官報道褚三清新裁鶯管銀簧啞
一曲玄雲鼓未成

天府官曹夙有期金枰玉粟賜漁師一彈指頃天台近
始悟三生石上棋

此余方外生余善追和張外史小游仙詩一十解持
藁來余不能加點讀至長桑樹爛天雞死座客遶林
三叫以為老鐵喉中語也又如一壺天地小於瓜雖

老鐵無以著筆矣故樂為之書至正癸卯春王正月
上日鐵龍道人在玉山高處試奎章賜墨書

明德遊仙詞十首自天柱山傳來依韻繼作雲林道
氣者觀之亦足自拔於埃壒矣 雨上

白玉之盤滄海東蒼蒼下視遠如空請看端正山河影
不滿坳堂盃水中

鴻寶枕函雲積疊芝臺爐火煖氛氲子能試喫青精飯
我亦聊書白練裙

夜久搏桑海色分珠宮望拜赤龍君洞庭未省君山在
元是崑崙小朶雲

藤蘿石上尋長迹金粟圖中見小身抖擻幾重衣祴看
情知不染散華人

厭見霓裳舞廣庭罷看三十九章經道人腰着金鴉嘴
自向松陰洗茯苓

左股清池足漚麻池中肥水是松花早知魏帝一丸藥
肯信東陵五色瓜

恥作深山服食仙
伐毛洗髓固依然
木蘭墜露研朱寫
只寫南華秋水篇

腳底琴生三尺鯉
袖中阿母一雙桃
別時勞動凌波襪
爛月如銀曬夜濤

眼中自小薄蓬瀛
日月雙飛下始清
見得明窓塵彷彿
定知草創大丹成

玉格金科自有期
赤城何待遠尋師
壁梭也解為龍去
樵斧如何只看棋

丙戌歲四月二十日靈石山登善精舍寫

向嘗次韻信都趙君季文父遊仙詞亡友虎林張君
伯雨父見而愛之亦嘗依韻以屬和崐山清真觀道
士余君復初伯雨愛友也寫所和詩以遺復初復初
今年久歎余於吳郡之城南乞余寫昔所和合張君
之什併藏之江空歲晚朋友間能詩如伯雨寥寥絕
響因寫舊作不能不興感云耳今年至正二十年庚
子歲之冬也遂昌鄭元祐明德父

金碧樓臺瀛海東
娉婷仙子下遙空
聖凡千古無窮事
都在鸞笙一曲中

靄靄身中三素雲
鼉暉出海共氤氲
桃霞沐雨輕勻面
柳浪含漪細織裙

鳳麟洲上水烟分
女伴同祠李少君
點定易遷宮裏籍
步虛回首踏紅雲

煌煌朱樹四時春
樹影玲瓏月滿身
理罷玉笙朝斗去
就中誰是避秦人

雲旂阿母降珠庭母為雙成欲受經塵世登真無要訣
藥囊辛苦貯參苓

纔吹松屑飯胡麻又見蟠桃一度花不為靈姝一服食
金盤那得不如瓜

窈窕溪真十二仙靈犀分水夜長然珠宮每把皇人筆
點染青瑤第幾篇

寶髻駢雲誰最高花間行數舊栽桃生洲月出星官近
騎着神魚舞翠濤

紫皇親駕按宸瀛又見鯨波澈底清
仙籍不能無謫降塵緣敢望有虧成

欲採靈芝恐後期魚遊千里費尋師
不因悟得長生着一局難終未了棋

至正二十年庚午歲冬十月書於吳郡城南之寓舍
銀河萬里海雲東直泛靈槎上碧空
仙女踏歌星漢裏老龍吹笛浪花中

金粟天高碧殿雲鏡中空影夜氤氲
白鸞樹下三千女

一色龍銷玉雪裙

月照旌旗夜未分行宮望拜玉華君衆中王母雙龍駕
飛動神州五嶽雲

令威化鶴已千春華表歸來是後身城郭悲歌荒塚在
到頭應愧學仙人

白鶴下啄瑤草庭道士夜讀神農經問之長生有寶訣
授以松根千歲苓

溪水流香飯熟麻洞中千樹玉桃花金盤日日飛仙供

勅賜安期海上瓜

鬱蕭臺上會羣仙
龍燭飛光曉夜然
玉殿歸來環珮冷

白雲猶護古苔篇

麟洲宮殿五雲高
夜赴瑤池燕碧桃
借得仙人紅尾鳳

月中飛影拂波濤

鈞天按樂召蓬瀛
千把芙蓉朝太清
一曲霓裳羽衣舞

仙家只數董雙成

長生誰解問佺期
黃石空為孺子師
何似山中閒日月

松陰自了著殘棋

游仙詩遂昌其最優乎貞居仙去不可復得清真余
君復初請余和之以繼二妙之後其知言乎昔揚雄
作太玄曰後世有揚子雲必好之蓋謂作者非難知
者為難也復初舊有能詩聲余故喜之遂為賦此但
不可與不知者言耳太原郭翼識

元賢翰劄疏

右前海寧州同知楊性所藏先友遺迹一卷凡十一

人詩文若干篇性曰先君子字伯振至正間從事浙省一時名大夫士多與往來為詩文性收藏甚富兵火之後往往散失此其僅存者且以先友不著字與官爵劣於柳記求余記之以余嘗游諸公間也盛熙明字熙明能書辟奎章閣書史著法書考傳於世堵簡字無傲能書畫浙省掾吳溥字溥泉以才識自負結交海內名士後兵興福建守臣承制署為其省參知政事楊維禎字廉夫丁卯進士江淞儒學提舉俞

氏兄弟者吳人俊字俊平江路推官庸字子中華亭
縣尹書有晉人風葛元喆字元喆戊子進士翰林編
修官高明字則誠乙酉進士柯九思字敬仲奎章閣
鑒書博士劉基字伯溫今御史中丞黃潛字晉卿甲
寅進士翰林學士謚文獻文章為世推重此致政後
所書謙恭端謹足為後進取法觀之猶可想其儀刑
嗚呼余嘗謂人子欲顯其親至錄其所與交若柳子
者可謂孝於其親無所不用其心然所記不過姓名

爵里而已能併存其遺文如此可謂有加前人者哉
東坡謂先友記六十七人考之於傳卓然知名者二
十人今楊氏先友十一人其文章事業鮮不載國史
者性言其所散者趙文敏公康里巖公仲弘楊先生
衆仲陳先生道士張伯雨則又無愧柳記多矣伯振
君諱祖成仕至山陰縣尹嘗從學須谿劉先生性字
彛仲學於廉夫少學詩於文獻齊郡張紳拜手謹題
趙松雪書洛神賦卷

魏國趙文敏公書此洛神賦當是大德之時後之學書者能闕其藩籬者蓋亦鮮矣况堂與哉君羽其葆之後學危素燕城清淨軒題

趙文敏書高上大洞玉經

大元延祐三年歲在丙辰五月望為石塘尊師書

集賢學士資德大夫趙孟頫


此卷乃趙魏公六十三歲所書至精至妙非言詞贊美可盡蓋公之字法凡屢變初臨思陵後取則鍾繇及

義獻未復留意李北海此正所謂學義獻者也舊嘗
獲見周侍御家侍御既坐貶竄竊意必歸天上不知
復流落人間今得披玩累日抑何幸哉殷卣周彝而
此卷不可得博雅君子尚思謹秘而傳焉金華宋濂
題

昔華陽洞中仙經多楊許二君手書結字畫符之妙
所以為洞天千載秘寶近世吳興趙公子昂書法畢
絕偏善小楷又嘗親授洞訣於茅山劉真人所以書

此其可寶不愧古人矣僕忝學以來忽焉老至得隱地於臨川華蓋浮丘壇東麓仙人茅公修行故處將結龕誦經得見此卷猶記是年與趙公同在京師今二十三春公與劉君各已仙去邈瞻回風俯仰慨然大洞三境弟子虞集書

至正九年歲在己丑秋八月二十又三日拜觀於茗溪之上



續書畫題跋記卷七

欽定四庫全書

子部

續書畫題跋記卷八

詳校官中書_臣朱文翰

編修_臣程嘉謨覆勘

總校官知縣_臣繆琪

校對官編修_臣汪鏞

謄錄監生_臣李昂

欽定四庫全書

續書畫題跋記卷八

明 郁逢慶 編

趙魏公楷書洛神賦

大德三年十二月二日書與子中

孟頫

子建洛神規倣宋玉神女精麗相埒而瀏澆過之或
誣以感甄之事潛夫詩話力辯其非而東阿紀夢
形容巧絕比李長吉前後復自相反何哉余頃見淳

熙秘閣帖五令所草賦止騰文魚以警乘而下筆勢
飄逸殆與此賦相頡頏今學士乃楷書全文道勁清
婉尤為可愛子中得之以與通甫二君皆早世學士
晚年筆力愈奇二君不及見之矣辛酉夏至日墻東
老叟題

柳誠懸云子敬洛神賦人間合有數本今世所見唯
自嬉至飛十三行耳蔡君謨云子敬放肆豪邁與右
軍差異臨學之家必謹其辨矣趙承旨一筆全文好

事者欲考王氏父子之法此其可觀者乎延祐中集
從承旨是集賢翰林嘗出此賦真迹九行見示上有
阜陵題字甚謹又三行別得之云是賈相似道購諸
北方者也計其歲月應是後此書十餘年乃得之耳
蜀郡虞集伯生甫識於吳郡寓舍夫容州至治二年
九月十五日

篆隸變真草興義獻獨擅厥長時去浸遠真跡間見
今世所傳惟石刻耳而石刻又不能得其初模者如

洛神賦文字翰墨卓為二美復無完本昔曾子固記
墨池謂羲之之書晚乃善則其所能蓋亦以積力自
致非天成然後世未有能及者今觀趙公子昂所書
是賦全篇疊疊逼真與他本絕異非蚤歲晚年可比
通甫子中余皆及識之子昂固以能書著大名於當
世不假贊美二賢蚤記玉樓矣承旨公亦既云亡欲
求一字已不可得況若此賦哉通甫子仲長出以示
余感慨久之仲長宜十襲珍收慎毋輕出至治癸亥

立夏日書

鳴鳳

李氏
時可

周越法書苑王獻之字子敬羲之第七子官至中書
令正書入神品洛神賦小楷烏絲欄寫成精密淵巧
出於神智後有柳公權跋尾云子敬好寫洛神賦人
間合有數本此其一焉寶歷元年正月二十四日起
居郎柳公權記亦楷書又柳璨題云天祐元年五月
六日堂姪孫中書侍郎同中書門下平章事判戶部
璨續題子敬帖後越觀歐柳筆法全出此書也又載

子敬初為謝安長史太元中起太極殿安欲使獻之
題榜以為萬代之寶而難之乃說韋仲將題凌雲臺
之事獻之知其旨乃正色曰仲將魏之大臣寧有此
事使其若此知魏德之下衰矣安遂不之逼又李嗣
真論書體樂毅論太師箴體皆真正有忠臣烈女之
像告誓文曹娥碑其容慘悴有孝子順孫之象逍遙
篇孤雁賦迹遠趣高有拔俗抱素之象畫像贊洛神
賦姿儀雅麗有矜莊嚴肅之象所謂見義以成字成

字以得意非獨研精措理實根於教化矣

至治三年七月二十五日寓齋錄記

泰定丙寅七月既望龔璠觀於吳中之寓舍於是昂翁之歿五年矣儼之大令此則人琴未遂俱亡者仲長寶之

洛神賦嘗屢書之世傳十三行者以其所見入石非可遂以為據也柳誠懸謂人間合有數本則固不止是豈它本誠懸亦未之見耶此松雪老人所書全篇

雖自用其體然應規合矩抑可謂善學大令者歟今
人觸目贗本一見便疑其非不知其中固有不可以
偽為者矣微仲長蓋未足以語此

東陽柳貫識

余家所藏舊刻洛神賦累朝名人題識於後者今錄
附於此

普通三年正月徐僧權 湯法象 滿騫

姚察 丁道珍 唐懷充

中書侍郎禮部尚書平章事集賢殿大學士鶴所姚
懷珍

天嘉二年十月二十三日

中書舍人程昇

開元十八年三月二十七日

叅軍事學士諸葛穎

釋智果

咨議叅軍開府學士柳碩言

均宋丙子歲
正月十六日

至正二十五年乙巳四月十二日袁泰記

仲長

子建之賦洛神麗矣然其子則遠焉子敬喜書之而
子昂亦喜書之豈其才情氣習有所相類者歟十三

行真跡不可復見一刻本翩翩逸氣猶能動人此全文固書中之佳者然細觀之殆少粟焉若以越中韻士與河朔少年馳逐耳知書法者當能辨之天全翁為石田高尚書

宜在黃跋後

趙公用意楷法窮極精密故其出而為行草縱橫曲折無不妙契古人不善學者下筆輒務為傾側之勢而未嘗窺其用意處是以愈工而愈不及也此賦筆法尤森嚴學書家宜守為律令仲長尚寶藏之泰定

元年六月八日金華黃潛書

虞雍公誅蚊賦虞伯生書

文多不錄

右先太師丞相雍國忠肅公所著也先公文集舊刻蜀中成書未久焚於兵火曾叔祖寶慶府君將求而刻之湖南亦未及如志而運革內附後先叅政廣求之不能得眉州故人史公孝祥守興化聞黃伯固家有之邈不可得也集在京師屬閩教授謝中物色之來報云有軍官好書購得此欲藉手與集相見然終

不能得之先叅政至泐須親戚韓大則得誅蚊賦草
於侯頤軒道士處蓋大德庚子歲也故人閒上人亦
蜀中同出東南之家以舊故自吳門訪集臨川山中
問此物所在出而視之則得之三十六年而先叅政
亦棄諸孤十七年詩書之緒不絕如綫感慨今昔血
涕隨之偶得此卷錄送上人貴得存遺珠於既失尚
故物之可求也元統乙亥三月二十七日集謹識

宋之南其宰執惟虞雍公為最賢觀其誅蚊賦所謂

使天下之為人臣者得以安其君天下之為人子者
得以寧其親則知公之志誅惡鋤姦者欲以寧君親
也其以忠孝教天下後世者至矣伯生世其家學能
於聖時致身西清被寵眷也殊甚及閑寂中乃書先
太師此賦以贈人其志亦有所在乎閒上人再見伯
生其為我驗之

和林魯威叔重父謹題

因讀誅蚊賦深憐愛國情三公登間牒四海失升平
早覺文章貴爭期德業成雲仍蒙世祿翰墨負時名

丹丘柯九思賦

任齋惟庚寅吾以降

觀雍公少年之作可以豫見報國之志觀邵庵詳書之意可以深惟追遠之情忠孝藹然萃於一門嗚呼盛哉聞上人同是蜀人故獨得之當刻石寺中以傳永久庶不為他時夜壑舟也至正十九年乙未三月後學蘇大年頓首再拜謹書

黍民肆毒不勝誅屈宋文章太史書滄海遺珠畱得在白雲深處伴僧居
洛生王敬方

父作更生佛兒為命世英西州睹威鳳南國翦長鯨
不厭朝廷小終扶日月明誅蚊賦重錄妙墨世從衡

遂昌鄭元祐

右邵庵虞公手書其先丞相誅蚊賦藁也賦稿初藏
於侯頤軒家後為韓大則所得獻於公之先君子井
齋先生後公至吳侯道士因龍興閒上人謁公於寓
所一見具言賦藁公軒然而笑曰我已得之矣侯道
士為之惘然蓋大則初假之於侯而即以歸於公家

而侯初不知也元統乙亥閒上人謁公於西江遂書
以贈焉願軒本洞庭仙壇觀道士其度師楊紫霞與
侯亦蜀人宋季來吳一時名士之寓吳者若中書劉
公丞相吳公皆與之交游名重於時寶祐間自吳遊
天台中書公為之唱首作詩以餞其行而先師平舟
先生亦次韻焉先子與侯交游粗深每出以示之先
子求至懇切而侯迄不與先子歿後三年侯亦相繼
而逝其徒李碧山與椿相知因子之請即以歸之至

正甲午冬十月間上人因持此卷訪予於家而徵予
言予惟侯之平日靳吝於兩家遺墨眎若永為其有
既而卒各歸於其後人豈故家文獻不絕如綫而天
固假侯靳吝以待我後人耶所惜者公之先君子猶
克親得賦稿而予先子雖獲一見平舟遺墨而終不
能得之於生平也今公既即世而閒上人已老予恐
事之或湮故為詳著於此云眉山楊椿跋

虞雍公誅蚊賦刻石疏

宋丞相雍國虞忠肅公嘗作誅蚊賦內傳後公之六世孫翰林侍講學士以文儒顯告老還江右而白雲閒上人與之有舊自吳訪之於臨川蓋雍公文集舊嘗刻於蜀而版湮毀學士後雖貴而雍公集求之不得竟不復刊學士之文叅政公大德庚子歲亦嘗至泐物色雍公集竟不可得而僅於道士侯頤軒處得誅蚊賦稿然竟藏於家上人以賦稿為請學士為發篋取讀上人真跡不敢望得學士手書一通東還吳

則幸矣學士遂為草草謄錄而仍記顛末於賦後上人念學士詩文好事者已悉為刊板若雍公之功業雖不繫於文字有無而誅蚊僅存耳兼聞江右近經寇亂百不一存於是上人欲以學士所書賦勒之金石庶永久弗墜而上人老矣力弗逮乃以此賦予公之八世孫戡字勝伯者俾刻之勝伯既積學克世其家以世故棘蘿益貧困固宜寶而藏諸而猶慮夫泯而不傳抑亦負上人之意敢以是干諸好事君子見

金匱要略卷八
助焉則賦刻諸石無難者矣敢請

至正十七年秋八月遂昌山樵鄭元祐書

此賦之作其有所指乎不然驅之足矣誅之不足以
勝誅也豈其心欲盡殲蚊類乎抑知蚊有可殲者有
不必殲者如曰聚而殲旃曰殲厥渠魁不一施也南方
吐蚊鳥一鼓吻而蚊億萬今有人焉作相於南鼓為哆
侈之談而致於廷而咥我毗其猶之鷁乎斯人也何
不幸而不受誅於公節鉞之下以快一日之死而寧

受誅於千載史鉞之誅於萬死不可以贖之日吁可
悲也已賦序云余方窮居觀者遂謂其早年所作愚
謂此二字雖外間重寄而遙制於中弗獲以伸其大
義於天下後世則身都將相猶窮居匹夫同也嗚呼
吾雍公誅鷦有術而付之紙上空談為其世孫所錄
徒致憾於無窮耳諸跋柯鄭陳楊輩皆其孫同時言
稿已失而得言錄以遺於某亦既詳矣去公三百餘
載而同其志者吳下有沈啟南氏見錄本而購藏之

嘉禾周鼎與苕溪張子靜松陵史明古共借閱之鼎
欲號此賦為鷓鴣以發公地下一笑明古子靜聞予言
相掀髯大噱是日正月上旬之終歲乙未皇明成化
之紀元十有一年也

此帖今藏余家往在無錫蕩口得於華氏中甫處少
溪家兄重購見貽之物
元汴

趙文敏書洛神賦

公藏大令真蹟凡九行嘗為余手臨於松雪齋此卷

典刑具在居石刻之右句曲外史張天雨觀

至順四年閏三月十九日元文館記

蔡襄云王子敬愛寫洛神賦故世多傳十三行而已
余見陸子順所藏者其筆意峭拔陸得於文敏公且
謂文敏晚年楷法之進蓋得此故也或者又謂陸藏
十三行其法往往類歐搨今較文敏所書此賦誠與
中年臨本不同賦後所題年月當為公最後之筆故
其法度如此

元統二年六月考亭陳方題

子貞

當年子敬洛神賦歐褚臨摹不知數世人惟重十三
行真贋難分爭抵牾趙公書法宗二王手寫全篇復
前古上追黃庭下樂毅善刻唐臨俱未許殘編斷簡
久脫畧趙璧隋珠獲全睹宓妃下走天吳奔驪龍騰
驤老蛟舞人間欲見不易得往往收藏秘天府江南
故家多好事一紙寧論百金估臨池墨筆畫飛動貫
月虹光夜吞吐願加十襲重珍護却恐雷霆來下取

雲門唐珙 溫如

文敏公隸楷之妙俊麗飄逸蓋得於洛神為多此卷
尤見其波瀾老成蓋捐館之前二歲所書誠可寶也
正統八年九月十三日泰和楊士奇志

趙文敏真草千文

結字難筋骨相承不爾則有斷續之態子昂書法獨
步當世備聚諸體然變態不常或者以形似求之大
類優孟抵掌耳

袁子英題

慶梓削鐫見者驚猶鬼神非旦夕之功也或者觀其表而不觀其裏則不足以議子昂書矣

浦城楊載題

松雪翁千文平生閱數卷未有如此本精絕直逼永師後之書家恐難追及嘉靖庚戌閏月二十三日觀於至德里之小樓

子京

張貞居禊詩冊

凡五十五首載集中因不錄

自贊畫像

志逸心疲身清命濁逃同類而親援狙毒厚味而美藜
藿學取益而不勝其損事知危而姑與之安一龍一蛇
不厭已之深眇惡衣惡食先憂人之饑寒忽然為人而
反常若此若何以祛有身之患

已酉歲自春徂夏霖雨之時多五月來僅一日見青天
處礪阿幽篁中未有晨飯過子桑者間弄筆研寫謬語
盈冊以自料理耳詩凡五十有五首子英遇之持去勿

示不知我者

右句曲外史與袁子英所寫詩凡五十五篇其首兩
章迺此老道人倣鐵雅者也如道言清齋礪阿諸詩
皆其道趣中流出者若犇月卮則又頑仙之橫出者
吁道人仙去已一紀矣鐵雅之友屬之何人開卷愴
然不勝山陽之感至正二十又一年花朝日抱遺叟
楊維禎在清真之竹洲館書

至正壬寅秋八月十又八日海虞繆貞吳郡余大亨

昆山顧元臣同觀弟子蕭登拜題

隸古

東淮顧安定之觀於映雪軒時年七十有四

不識華陽舊隱居高情還憶聽松餘百篇真籙修都
遍滿卷新詩手自書一去丹臺閑日月幾回飛佩在
空虛重來化鶴應無恙華表春風動里閭

至正甲辰冬十二月郡人後學陳世昌拜觀

謹識

至正二十五年乙巳春三月豐城余詮觀

壬子正月五日過東婁十日耕學先生出以示僕乃

知貞居之與耕學交好之情若此也倪瓚覽

貞居先生清詩妙墨飄飄然自有一種仙氣信非塵俗中人也此卷手書以遺余者屢離兵燹似若有神物護持泉南陳君彥廉好古博雅與余同志故割愛以贈壬子夏六月汝易袁華書

張貞居詞翰政如月底疎松雲中脩竹信非烟火食之所能賞識宜為吾子英之寶藏也貞居自題云非知我者勿示今子英出以示余豈別久而弛其約束

耶齊郡張紳觀於孫氏映雪軒

戊申子月

右礪阿雜詩墨蹟五十五首乃張貞居詞翰最得意者亦自慎重不輕示人觀其小序可見雖然非子英之知貞居不能久藏至今非彥廉之好古博雅亦不能得子英之割贈所愛以交誼之篤而歸諸春草堂可謂得其所矣子英亦知人哉保為陳袁之家子孫左券珍之可也廬陵張昱題於凝香閣中

余觀在昔右文之際文章翰墨盖莫盛於東南矣不

惟列侍從居館閣者皆彬彬文學之徒至於方外名
流亦或負其清才絕藝擅名一時之盛故釋之徒有
笑隱忻上人道家者流有貞居張外史皆以詩文篇
翰照映乎山林而與虞趙歐黃諸君子交接於後先
迭響乎中外於是東南文物之盛殆前古所未聞今
觀陳氏所藏外史墨迹一冊能詩者或無此書能書
者或無此詩外史蓋兼之矣慨名筆之流傳念昔人
之凋謝江空歲宴不無有繼響者乎覽卷為之慨然

吳郡謝徽識

右張貞居自書詩一帙溫陵陳君彥廉之所藏戊申歲見於袁子英家今歸於君君別有貞居所書詩大小十餘幅可見物常聚於所好君作詩往往有物外意非獨愛貞居之書而已也壬子亥月張紳再題

張貞居以詩名湖海而翰墨尤為人所重片鱗尺楮往往見之蓋未有若此卷之富盛者也孫過庭云一時而有乖有合心遽體留日炎風燥皆其乖也神怡

務閒時和氣潤偶然欲書皆其合也今貞居自言自
春徂夏陰雨至五月之久故閒弄筆研以自料理則
非心遽體留日炎風燥正所謂神怡務閒時和氣潤
偶然欲書耳宜其聯篇接簡不覺其多而穠纖間出
清婉流麗有合於古人之度也其詩傳之人口已有
定論特語其書如此彥廉好古博雅必能加寶愛矣

蘇人王行題

余觀張外史自書襍詩一帙詞翰之妙使人如快雪

時晴行山陰道中幽景所奪應接不暇披覽竟日不能去手

勾吳張適識

貞居蚤學書於趙文敏公後得茅山碑其體遂變故字畫清道有唐人風格詩則出於蘇黃而雜以已語其意欲自為家也唐宋以來浮屠之能書與詩者雖衆然亦不能兩美況道流之久乏人哉此其自書禱詩也古律行草各臻其妙宜子英之慎與而彥廉之喜得矣

高啟識

右張貞居詩翰清原陳氏得於袁子英甫廬

熊記

歷代史臣不為釋老氏立傳或老氏有可書者則以置方技傳中皇明詔修元史始別有釋老傳之目而老首丘處機釋氏首八思馬且各有數人焉張雨生東南以工書善詩為名道流一時學士大夫若趙文敏虞文靖黃文獻諸公多與遊乃不得入傳或者疑之然處機八思馬之徒其在太祖世祖時大抵皆以功業顯故釋老氏有傳蓋不徒以其法而然者則夫

雨之可傳政不在此余嘗執筆從史官後得預是議
今觀雨自書雜詩於溫陵陳寶生家詞翰之妙如是
自當與趙虞諸公詩集並傳也

洪武壬子秋八月稽岳王彞識

洪武辛酉三月二十六日重書於春草堂 周祇

貞居真人詩文字畫皆為本朝道品第一雖獲片楮
隻字猶為世人寶藏況彥廉所得若是之富且妙耶
舒展累日欣慨交心噫師友淪沒古道寂寥今之才

士方高自標致余方憂古之君子終陸沈耳吾知前人好修不以為賢於流俗而遂已不患人之不知栗里翁志不得遂飲酒賦詩但自陶寫而已豈求傳哉倪瓚題壬子初月八日

貞居詩如月底踈松雲間脩竹字畫則若遠塞驚鴻春池科斗非特不染塵俗塵俗自不能染耳

張紳

壬戌陽月紳再觀於崆峒外史之丹室於是與彥廉

別十載矣

洪武丙辰秋九月彥廉自鳳陽還十有九日夜宿春
草軒復出此冊同觀題者自鐵崖先生以下凡十五
人存者惟八人耳撫卷不勝黯然汝易袁華識

溫陵陳彥廉氏出家藏張貞居所書襍詩凡五十五
首詞翰俱麗見之不忍去手子英袁先生與貞居友
善書此以贈又於卷末書曰勿示不知我者子英以
彥廉博雅故出而與之卷後題曰彥廉惟與余同志

故割愛與之雖然貞居非至交則不出袁先生非知
已亦不與彥廉既得每為珍玩晨夕余初學書即知
有句曲外史為浙之擅名者雖急於采其規格而世
甚鮮有及間獲觀數帖率皆真迹其於運腕指用紙
墨之妙誠超於衆能而成家者也以之才氣則並於
蘇米詞或有過之者故一時名重朝野得片紙如寶
珠璧豈偶然哉此帖知久深慕一見二三年不聞其
定在茲獲一覽平昔所見猶霄壤矣孰不珍其傳哉

癸亥歲孟夏耆山無為謹書於朝天宮之桂堂

張貞居平生慕米南宮之為人常為著中岳外史傳
故其論議襟度往往類之獨其詩句字畫清新流麗
不蹈南宮狂怪怒張之習蓋非獨其學問使然亦由
貞居寄迹方外不為聲利所累而又居東南形勝之
邦獲見故都文獻之懿優游林壑以養其真氣故其
發於詞翰者如此今去貞居二十餘年耳使人望而
企之若古仙人可勝歎哉友人陳彥廉氏得其翰墨

欽定四庫全書

續書畫題跋記

三

二帙皆平生得意作也余家與貞居世契展詠之餘
益增感舊之思云尋陽張來儀志

張貞居詞翰俱清逸飄飄然如驂白鸞遊霞鄉自非
有仙風道骨者不能到唐之羽流中杜光庭輩詎足
專美於前哉彥廉宜寶之洪武十九年蒼龍丙寅吳
僧道行敬觀於春草堂

余嘗愛張貞居此帖詞翰清拔風致高遠當其神清
氣和用筆遣意疾徐頓挫濃纖間出故雖連篇累幅

不厭其多玩之如飛鸞戾空明珠映月飄光粲然快人心目可謂絕類離倫特立道流之表自子英化去垂三十年意昔此帖亦遂淪沒今復覽於放鶴軒中展玩終日不能釋手信知至物終當有歸從道宜珍藏之東吳文泰重識

昔人作字類人若顏書之剛勁虞之美麗歐之清瘦亦似之余謂非唯字類人作詩雖言志而剛勁清麗亦似其人今觀貞居字之隨體賦形殊不經意詩之

隨詠寫志若出自然覽之則清氣可掬深類貞居之
為人昔人所云為信然貞居書此亦自得意者故題
以勿示不知我噫示之尚不輕得之者必好古博雅
也張昱為彥廉蓄之謂得其所陳從道得之可謂又
得其所矣從道宜保諸浚儀張宜識

僕平生最嗜外史詩集中諸律略皆上口僭評其高
處當為元人第一家妄論自信不必世人之同也故
其真跡所在特深貴之唯姚侍御家有稿一冊時獲

寓觀以為樂事其它所見簡短寂寥無足充余嗜者
戒卿何幸乃富有之如此當知貞居真跡流落人間
雖有存者斷不能與之為敵矣使僕時時來過出而
閱之味其點畫求其興致以開余情不亦暢乎

晚學楊循吉奉題

蔡天啟詩曰收拾三茅風雨樣高堂六月是冰壺貞
居收拾三茅風雨摠入冰壺真得天啟賦詩之真趣
矣貞居蛻骨仙去知在蓬萊第幾峰而仙迹長留人

金上石 卷八
間世帝不役雷電下取俾後世得肆元覽馳紫霞之
逸想動白雲之遐思瀟洒送壺中之日月不亦神哉
袁戒卿龍藏出以見示因題

成化癸卯春三月朔旦郡人黃雲識

此冊今藏余家向從文衡山處得之

元汴

方寸錢志

吳門朱珪氏師濮陽吳睿大小二篆習既久盡悟石鼓
嶧山碑之法因喜為人刻印遇茅山張外史外史錫之

名方寸錢持以過錢唐訪余於吳山次舍求一言白其
所謂方寸鐵者余笑曰予方以錢石心故乖於世而子
又欲乖吾之乖乎雖然古之豪傑修己治人者必自方
寸錢始黃金白玉可磨此錢不可磨也子以是錢印諸
金銀銅玉犀象使佩之者皆無媿於是錢外史氏心印
之敘行矣吁豈真求工於刻畫無戾夫古制也哉今妄
一男子釋蹻起問巷取封侯印如斗大印咫尺書駭役
帶甲百十萬如金翅鶚逐百鳥無一敢後者金斗之權

重矣哉吾不知果能為天子翦狂寇佐中興為生人開
太平無媿於汝鐵否不則徒以苟富貴不至腐尸滅名
不已使得珪方寸錢印斯可以蒙金斗而爵榮名矣珪
或為今將軍刻符印其以是告之至正十九年秋七月
八日李黼榜相甲進士今奉訓大夫江西等處儒學提
舉會此楊維禎書并誌

神斧磨天割紫雲仙葩殞玉發奇芬靈書寶訣開剛卯
不數人間小篆文

書刻輸君搃色絲前身想是伏靈芝虎頭食肉元無相
鑄鈕休傳左顧迢

我家金粟道人章瓦款蟠螭識未央千古典刑今復見
佩之何必獸頭囊

鏤玉塗金與錯銀盡將工巧失天真君能獨掃雕蟲技
定品它年合入神

伯盛朱隱君余西郊草堂之高鄰也性孤潔不佞於世
工刻畫及通字說故與交者皆文人韻士予偶得未央

故瓦頭於古泥中伯盛為刻金粟道人私印因驚其篆
文與製作甚似漢印又以趙松雪白描桃花馬圖求勒
於石精妙絕世大合松雪筆法惜其不得從游於松雪
之門使茅紹之專美於今世因題四絕於卷末以美之
伯盛勿以余言為譽後必有鑒事者公論也至正十七
年中秋日書於玉山草堂金粟道人顧阿瑛

方寸錢歌贈伯盛朱隱君

人心何危患多岐方寸之錢貴自持百鍊耿耿明秋暉

彼柔繞指惟詭隨朱盛剛勁真吳兒法書錢畫逼秦斯
晴窓握管儼若思學成變法出愈奇錢耕代筆猶神錐
用之切玉如切泥孤忠不媿月食詩清奇便賦梅花詞元
祐黨碑我所非驢鳴犬吠我所嗤雕蟲草技同兒嬉屠
龍妙割嗟奚為盛乎盛乎知不知北南車書復復來中
興定勒磨崖碑大書深刻非子誰肯至正二十年歲次
庚子夏六月初吉天台氏學者元鼎書於白蓮桂子軒

吳僧虛中

方寸錢銘

婁東朱珪字伯盛工古籀篆文其於六書之義考之尤
詳嘗以餘力刻印章則為吳中絕藝間遊錢唐遇句曲
張外史名之曰方寸錢錢以喻其能堅其志操期以進
乎道亦若桑國僑志於錢研之鐵云雖然科書廢已久
必以篆籀為師法漢隸而下不在論能復其古其庶幾
朱君乎朱君與予相游嘉其志操之日堅今年予來玉
山中驗朱君之書法益有進是猶張旭悟公孫大娘之

舞劍器也見其刻玉石如切泥則又若漆園氏誇庖丁解牛而得肯綮也張得於舞劍庖丁得於解牛吾知朱君得於書而悟外史方寸錢之旨矣遂述其事而為之銘銘曰

聖人作人文開龍馬出榮圖來神農氏尚結繩民弗犯俗龐淳史蒼頡肇有制譬孳乳乃曰字越夏商歷周秦科斗廢籀篆臻漢而晉書變作唐風媮政日惡闕日建今邈寥事刻畫昆吾刀鍾鼎隳石鼓頽心太古婁朱珪至

正歲舍庚子夏四月二十有六日河南陸仁造

方寸錢頌

猗方寸錢婉昆吾刀游刃發矧妙契縱操六書與旨探
贖捐勞史籀秦斯作則孔昭翔鸞翥鳳騰龍騫蛟為印
為章奎壁麗霄文苑藝林世賴榮褒我頌匪私永言弗
佻

至正庚子八月十又八日淮海秦約造

方寸錢詩奉美伯盛有道

隴右邾經上

朱珪手持方寸錢撫印能工漢篆文并剪分江龍噴月
昆刀切玉鳳窺雲它年金馬湏承詔此日雕蟲試策勲
老我八分方漫寫詩成亦足張吾軍

至正八月辛丑朔平湖草堂中寫

西夏朱仲義
隸古

朱生心似錢篆刻藝彌精應手多盤折纖毫不重輕么
麼形獨辨螭匾勢初呈漢印規模得秦碑出入明風流
金石在潤色簡書并餘刀庖刀解風斤郢匠成達觀應
自我賞會足平生趣刻無多訝因君託姓名

錢唐陳世昌

袖裏昆吾一寸錢江南碑碣萬家文玉符金印雲臺將
大篆煩君為勒名

雲間陸居仁

十年兵興徧天下名山大澤罹野火野火盡燒秦漢碑
咸陽鬼哭無人打故人吳睿業篆隸好古乃有如珪者
妙刻金粟道人章尤精白描桃花馬金印徒聞如斗大
零落當時建章瓦君不見黃鶴仙伏靈芝

闕

北海文章

長高價

武夷山樵者錢惟善題於海嘯軒

館閣諸公無不喜用名印雖草廬吳公所尚質樸亦所不免惟揭文安公絕不用其制吾竹房論著甚詳然其所用又多不合作趙文敏有一印文曰水精宮道人在京與李息齋素子方同坐適用此印素曰水精宮道人政可對瑪瑙寺行者闔座絕倒盖息齋元居慶壽寺也鮮于郎中一印曰鮮于伯機父吾子行曰可對尉遲敬德鞭滑稽大略相同子行嘗作一小印曰好嬉子盖吳中方言一日魏國夫人作馬圖傳

至子行處子行為題詩後倒用此印觀者曰先生倒
用了印子行曰不妨坐客莫曉他曰文敏見之罵曰
箇瞎子他道倒好嬉子耳太平盛時文人滑稽如此
情懷可見今不可得矣余座主張先生仲舉在杭一
印曰平臯鶴叟盖用杭州三山名臨臯亭黃鶴也古
人亦有如此者如雲烟過眼錄載姜白石印文鷹揚
周郊鳳儀虞廷盖以其姓字作隱語辛稼軒印曰六
十一上人又以破其姓文米元章書史言劉巨濟符

符字亦好奇耳 雲門山樵張紳書於朱伯盛印譜後
予嘗見故元時吳人印章刻畫古雅疑其多出於吾
子行之手而不知有朱伯盛者今觀楊鐵厓顧玉山
輩方寸錢志并詩始知之伯盛名珪玉山稱其為西
郊草堂之鄰蓋崑山人葉君廷光與為同縣宜其獲
此而藏之也

成化丁未三月晦吳寬題

趙文敏楷書千文

大德五年五月五日書與韓定叟

孟頫

後二年重見此卷則定叟已施與稽山秀林蔚公講
主矣因書其後以識之五月二十七日松雪齋題

定叟余世父也松雪翁為此書迄今四十年世父已
卒而蔚師亦示寂久矣如此者豈可多得哉撫卷慨
然

安陽韓性

明善

松雪翁盛年書法精妙姿媚尤非暮年之比學書者
當先以此為法

京兆字文公諒

此本猶是吳興中年書永師所書八百餘本其蚤歲
真蹟當亦稱是學書白首有不能窺其藩果係人品
哉

張雨

予嘗見松雪翁書千字文前所見字稍豐肥而此軸
所書尤為細謹比之晚年筆畫婉勁殊少不及則嫵
媚不減也然字書楷真行草無出於晉楷固晉法行
書亦然要之本朝能書者松雪翁為第一人品也知
書者可不敬畏哉時至正十一禩菊節前徑山鼎翁

祖銘

永禪師書千文八百本魏公所書當不減此此卷大德五年為韓定叟書定叟會稽人與公厚善集中有贈定叟及留別詩可考公以大德三年為江浙儒學提舉此當是為提舉過會稽時書是歲公四十有七正中年書也跋者四人韓性字明善定叟諸姪道德文學元中世鉅儒字文公諒字子貞元統進士為史官張伯雨茅山道士勾曲外史也三公並有盛

名而祖銘亦禪宗大老所著四會語錄其字石鼎杭
州徑山僧云四明者本奉化人 文壁

宏治甲子七月二十一日觀於沈潤卿氏之仰止樓

吳郡都穆


趙文敏四體千文卷

延祐六年十一月二十三日為錄事焦彥實書於松雪
齋

右文敏趙公四體書千文惜不見司馬子微五體書

道德經較此何如也近代是書為最張雨記

文敏公真草篆隸平日未嘗多寫觀此卷必為焦侯
好事而書惜其九原不復作矣
唐棣敬題



續書畫題跋記卷八